

PRÆFATIO

ad Ludi-Magistros.



Ruditatis antidotum Eruditio est, quæ in Scholis Ingenia imbui debent: sed ita, ut Eruditio vera, ut plena, ut lucida, ut solida sit. Vera erit, si non nisi utilia vitæ docentur & discuntur; ne postmodum queritandi occasio sit: *Necessaria ignoramus, quia Necessaria non didicimus. Plena*: Si expoliatur Mens ad Sapientiam, Lingva ad Eloquentiam, Manus ad actiones Vitæ solerter obeundas: hoc erit *sal* illud vitæ, *Sapere, Agere, Loqui. Lucida* erit, ac per id firma & solida, si quicquid docetur & discitur, non obscurum sit, aut confusum; sed clarum, distinctum, articulatum, tanquam digiti manuum. Hujus rei fundamentum est, ut *Sensualia rectè præsententur Sensibus*, ne capi non possint. Dico, & altâ voce repeto, postremum hoc reliquorum omnium esse fundamentum; quia nec *Agere, nec Loqui sapienter possumus, nisi prius omnia, quæ agenda sunt, & de quibus loquendum est, rectè intelligamus. In Intellectu autem nihil est, nisi prius fuerit in Sensu. Sensûs ergò circa rerum differentias rectè percipiendas, gnâviter exercere, erit toti Sapientiæ totiq; sapienti Eloquentiæ, omnibusq; prudentibus Vitæ actionibus fundamenta ponere. Quod quia vulgò in Scholis negligitur, discipulisq; discenda objiciuntur, nec intellecta, nec sensibus rectè præsentata, fit, ut docendi & discendi labor molestè procedat, exiguumq; ferat fructum.*

En igitur novum Scholis Subsidiû! *Omniû fundamentalium in Mundo rerum, & in Vitâ actionum, Pictura & Nomenclatura!* Quam ut vestris cum discipulis pertransire libenter ne gravemini, boni Magistri, quid inde boni veniat expectandum, paucis explicabo.

Liber est, ut videtis, haut magnæ molis: Mundi tamen totius & totius Lingvæ Breviarium, plenus Picturis, Nomenclaturis, rerumq; Descriptionibus.

I. Picturæ, sunt rerum omnium visibilium (ad quas & invisibiles suò modò reducuntur) totius mundi Icones, idq; ipso fermè rerum Ordine, quò in Januâ descriptæ sunt, atque plenitudine eâ, ut nihil adeò necessarium, cardinale omittatur.

II. Nomenclaturæ, sunt suæ cuique Picturæ superpositæ Inscriptio.